



Rabu, 14 Juli 2021

Ogen: Esekiel 7:15-27



“Emas Ras Perak La Meherga”



Nai sanga jaman reformasi, duit reh ergana, emaka la sitik orangtuanta ndatken untung si mbelin. Sabab, tupung si e orangtuata melala kal nimpan emas jadi tabungenna. Erlipat erga emas paksa e, e maka melala kal untung siidatken kalak si nabung emas. Bagepe perhiasen diberu, bura, igelari poun perak. Ngatakenca enda barang-barang si meherga i bas masyarakatta. Janah sada kehagan man kalak si melala barangna si bage rupa.

Amin bage ergana barang-barang enda, kepeken lit paksa-paksa maka barang si bage rupana lanai meherga. Bageme si ituriken i bas renungenta paksa enda. Bangsa e ngenanami erbage kiniseran la saja rubati tapi pe enggo mate erkiteken pinakit ras kelihen. Daging kula enggo lanai sikap, tuhu kote, paken enggo i bas guni nari janah erta kebayaken lanai lit ergana. Ibenterken ku pasar- desken ngambengken sampah.

Kerina kebayaken e la ngasup ngkelini geluh manusia. Nai si niakap manusia meherga, gundari lanai lit ertina sabab ipakena jadi berhala, gana-gana si ciga ate Dibata maka pernembah ate Dibata e ngerehken ukumen sierbahan kerina jadi rontang.

Bage me adi bangsa e lanai patuh man Tuhan, ukumen nari nge reh ndahi ia. Pegalamen geluh bangsa Dibata enda, ula min nari siulih. Payo emas, pirak ras batu-batu mejile e tuhu meherga. Bahanlah si meherga e tetap meherga sabab kerina itepa Dibata. Terdauhen, tetap ergan kiniteken man Dibata si erbahansa kita jadi meherga.